

1001 MASALAH

ABU AL-MUKHTAR SEDIA MENJAWAB



Pertanyaan dari:

Al-Hājj Ahmad Hussein,
Terentang Jalan Cincin,
Batu 21 Suku,
Jasin – Melaka.

1. Adakah bau harum wangi yang ada pada *Hajar al-Aswad* di Makkah itu memang dari asal ataupun sengaja disapu dengan minyak wangi?

2. Apakah kelebihan yang diberi oleh Allah kepada seseorang yang dapat masuk ke dalam *Bayt Allāh* masa dibuka pintunya setahun sekali itu?

Jawab

Bau harum wangi yang ada didapati pada *Hajar al-Aswad* itu adalah bau mendatang yang dengan sengaja disapukan oleh orang-orang yang mengerjakan haji dengan sejenis minyak atar yang dinamakan *Hajar al-Aswad*, bukanlah wangi itu bau asalnya. Oleh itu menurut mazhab kita al-Shāfi‘ī seseorang yang sedang memakai ihram sama ada untuk mengerjakan haji atau umrah dilarang baginya mencium atau mengucup *Hajar al-Aswad* yang sedang berlumuran dengan minyak wangi itu kerana ditakuti melanggar larangan-larangan seseorang yang sedang di dalam pakaian ihram. Kerana seseorang yang sedang di dalam ihram itu dilarang memakai bauan-bauan¹ yang harum.

Ada perbuatan khurafat yang pernah

dilakukan oleh setengah daripada para jemaah haji bangsa kita, mereka membawa sebotol minyak atar *Hajar al-Aswad* dan segumpal kapas. Minyak atar itu mereka curahkan pada *Hajar al-Aswad* itu kemudian gumpalan kapas itu mereka sapukan pada *Hajar al-Aswad*. Kapas itu mereka bawa pulang ke tanah air dibahagi-bahagikan kepada kaum keluarga dan sahabat handai supaya dikucup dan dicium. Kononnya barang siapa yang mencium kapas itu seolah-olah mereka mencium *Hajar al-Aswad* di Makkah. Sebenarnya perbuatan tersebut adalah suatu perbuatan khurafat yang tidak ada kena-mengena dengan ibadah haji.

Ada pula setengah riwayat dari para ulama mengatakan asal *Hajar al-Aswad* itu diturunkan adalah berwarna putih melepak bersinar-sinaran, tetapi ia bertukar menjadi hitam setelah dikucup dan dicium oleh Nabi Ādam yang banyak bergelimang dengan dosa.

Adapun berkenaan dengan kelebihan-kelebihan yang diberi oleh Allah kepada seseorang yang dapat masuk ke dalam *Bayt Allāh* itu hingga sekarang kami belum bertemu dengan sebarang dalil daripada hadith ataupun al-Qur‘ān yang menyatakan tentang keistimewaan atau kelebihan yang akan diterima oleh orang itu. Cuma sewaktu seseorang itu berada di dalam Kaabah (*Bayt Allāh*) ia dibolehkan

mengadap sembahyang ke arah mana sahaja yang disukainya.

Sekarang bahagian sebelah atas Kaabah itu telah di tutup dengan simen dijadikan sebagai *sufūh*, (bumbung rata). Kami pernah mendengar cerita orang tua-tua yang telah pernah mengerjakan ibadah haji, kata mereka orang-orang yang berada di dalam Kaabah itu tidak boleh mendongak ke atas, kalau mereka berbuat demikian sewaktu mereka keluar nanti mereka akan menerima di antara dua musibah: sama ada mati ataupun gila. Cerita-cerita ini juga adalah tidak benar dan tidak harus dipercayai sama sekali.

Pertanyaan dari:

Othman bin Endut,
Kampung Dato’ Panglima Garang,
Kuala Langat – Selangor.

Adakah boleh seseorang buang air kecil atau besar di tepi tebing sungai yang airnya mengalir, sedang ia mengetahui air sungai itu selalu digunakan orang untuk mengambil air sembahyang?

Jawab


Sebelum kami menjelaskan tentang hukum perkara yang saudara tanyakan di atas, maka ada lebih baik kami bentangkan tiga hadith Nabi yang ada perkaitannya dengan perkara tersebut.

Hadith yang pertama:

“*An Ibnu ‘Umara qāl: Nahā Rasūlu Allāhi ṣallā Allāhu ‘alayhi wa sallam an yatakhallā tahta shajaratin muthmiratin wa nahā ‘alā ḍaffati nahri jār*”.

Artinya: (Dari Ibn ‘Umar ia

¹ Perkataan sebenar ialah bau-bauan.



Terusan Suez sebuah terusan yang memperhubungkan di antara Laut Mediterranean dengan Laut Merah. Terusan ini telah dijadikan hak milik negara oleh Republik Arab Bersatu pada tahun 1956. Akibat dari pencerobohan Israel terusan ini telah ditutup.

berkata: Telah melarang Rasulullah (S.A.W) seseorang buang air di bawah pohon kayu yang sedang berbuah, dan beliau melarang pula seseorang buang air di tepi tebing sungai yang mengalir) – Hadith riwayat al-Ṭabrānī.

Hadith yang kedua:

“Ittaqū al-la‘ānayn! Qalū: Wa mā al-la‘anāni yā Rasūlu Allāh? Qāla: Alladhī yatakhallā fī ṭarīqi al-nāsi aw fī zillihim.”

Ertinya: (Takutilah akan dirimu dari dua sebab yang kamu dilaknat. Sahabat-sahabat bertanya: Apa dia dua sebab yang menyebabkan seseorang itu dilaknat wahai Rasulullah? Jawab baginda: Iaitu orang yang buang air di jalan raya tempat manusia lalu atau di tempat manusia berteduh) – Hadith ṣaḥīḥ riwayat Muslim.

Hadith ketiga:

“Ittaqū al-malā‘ina al-thalāth: Al-barāza

fī al-mawāridi wa al-zilli wa qāri‘ati al-ṭarīq.”

Ertinya: (Takutilah akan diri kamu dari tiga perkara yang dilaknat, iaitu buang air di tempat jalan menuju ke air, di tempat berteduh dan di tengah jalan raya) – Hadith riwayat Ibn Mājah, Abū Dāwud dan Hākim.

Hadith lain:

Di dalam suatu hadith lain yang diriwayatkan oleh Imam Aḥmad dari Ibn ‘Abbās ada dikatakan bahawa Rasulullah (S.A.W) melarang buang air di “*naq‘ mā’*” iaitu tempat berkumpulnya air.

Keterangan:

Dengan keterangan dari hadith-hadith yang tersebut di atas, maka kita dapat kesimpulan bahawa Rasulullah (S.A.W) melarang seseorang Islam membuang air besar atau kecil di tempat-tempat yang tersebut di bawah ini:

1. Di jalan-jalan raya atau mana-mana jalan kecil yang selalu dilalui oleh orang ramai.
2. Di bawah pohon-pohon kayu yang tidak berbuah tetapi selalu digunakan orang sebagai tempat berteduh.
3. Di bawah pohon-pohon kayu yang sedang berbuah.
4. Di tempat-tempat yang menuju ke air.
5. Di tepi tebing-tebing sungai yang mengalir.
6. Di tempat berkumpulnya batang air seperti kolam dan sebagainya.

Jadi tentang jawapan pertanyaan saudara itu ialah tidak boleh bahkan haram seseorang buang air kecil atau besar di tepi tebing sungai yang airnya mengalir, kerana ia termasuk di dalam jumlah larangan yang disabdakan oleh Rasulullah di dalam salah suatu hadith-hadith yang tersebut di atas.